

**Ujaqqanik pinnerasaasiassanik nunatsinneersuunerannik uppernarsaammik
allagartalersuineramik pilersitsillutik atuutsitsilernissaannik Naalakkersuisut
peqquneqarnissaannik inatsisartut aalajangiiffigisassaattut siunnersuut.
Tunngavigineqassalluni ujaqqat pinnerasaasiassat nunatsinneersut ujaqqallu qiperukkat
nunatsinneersut pillugit uppernarsaammik allagartaliisarneq pillugu nalunaarussiaq
juni 2017-meersoq.
(Inatsisartunut ilaasortaq Peter Olsen, Inuit Ataqtigiit)**

pillugu

Inuussutissarsiornermut Aatsitassanullu Ataatsimiititaliap

siunnersuutip aappassaaneerneqarnerannut

ISUMALIUTISSIISSUTAA

Inuussutissarsiornermut Aatsitassanullu Ataatsimiititaliap suliarinninnermini ilaasortarai:
Inatsisartunut ilaasortaq Henrik Fleischer, Siumut, Siulittaasoq
Inatsisartunut ilaasortaq Múte Bourup Egede, Inuit Ataqtigiit, Siulittaasup tullia
Inatsisartunut ilaasortaq Aqqalu Jerimiassen, Atassut
Inatsisartunut ilaasortaq Hermann Berthelsen, Siumut
Inatsisartunut ilaasortaq Randi Vestergaard Evaldsen, Demokraatit
Inatsisartunut ilaasortaq Peter Olsen, Inuit Ataqtigiit
Inatsisartunut ilaasortaq Tillie Martinussen, Suleqatigiissitsisut

1. Siunnersuutip imarisai siunertaalu

“Ujaqqat nunatsinneersut pinnerasaasiat ujaqqallu nunatsinneersut qiperukkat pillugit uppernarsaammik allagartaliisarneq pillugu nalunaarussiaq” 2017-imeersoq¹ tunngavigalugu uppernarsaasiisarnermik aaqquissuussinermik pilersitsinissaq siunnersuummik siunertaavoq. Nioqqutissiornermi nittarsaanermi uppernarsaammik atulersitsinnaaneq nassuiaammi tikkuarneqarpoq, tassami uppernarsaaseeriaaseq atorneqarsinnaasoq alla - ilisimatuussutsikkut uppernarsaasiisarneq – akisuutut katitigaasorujussuartullu nalilerneqarmat. Inuussutissarsiutip annertusiartornera siunnersuuteqartup siunnersuummini erseqqissaatigaa, 2016-imilu apersuinerup paasinarsisissimagaa annikitsumik aatsitassarsiornermut akuersissummik peqartunit 25-usunit 14-it arlaatigut uppernarsaaseeriaatsimik ujartuisut.

¹<https://naalakkersuisut.gl/~media/Nanoq/Files/Publications/Raastof/GL/Certificeringsredeg%c3%b8relse%20KAL.pdf>

2. Siunnersuutip Inatsisartuni siullermeerneqarnera

Siullermeerinninnermi siunnersuut partiimit ataatsimit taparserneqarpoq, siunnersuutillu aningaasartuutaanissaa partiinit allanit uparuarneqarluni siunnersuutillu/lluunniit itigartitsissutigineqarnissaa toqqaannartumik inassutigineqarluni. Naalakkersuisuttaaq siunnersuutip itigartitsissutigineqarnissaanik inassuteqarnissaminnik tunngavissarsipput. Tassunga atatillugu *“Ujaqqat nunatsinneersut pinnerasaasiat ujaqqallu nunatsinneersut qiperukkat pillugit uppernarsaammik allagartaliisarneq pillugu nalunaarusiap”* 2017-imeersup saqqummiunneqarnerata kingorna malitsitut suliamut ingerlanneqartumut, § 37-ilu tunngavigalugu apeqquteqaat 335/2018-ikkut ersersinneqartumut innersuussisoqarpoq. Nuummi december 2018-imi, annikitsumik aatsitassarsiornermut akuersissummik peqartunit 25-usut ilaannit 20-nit peqataaffigineqartumik isumasioqatigiittoqarsimasoq tassannga paasinarsivoq. Tassani uppernarsaasiisarnermik aaqqissuussinermik eqqussisinnaaneq oqallisigineqarsimavoq, nittarsaanermut uppernarsaammik atulersitsisinnaaneq annikitsumik aatsitassarsiornermut akuersissummik peqartunit najuuttunit isumassarsiatut pitsaasutut nalilerneqarsimanani. Ilisimatuussutsikkut uppernarsaasiisinnaaneq ataasiakkaanit ujartorneqarsimalluni, peqatigitilluguli naliliisoqarsimalluni aaqqissuussinermik taamaattumik atuilernikkut uppernarsaasiiniarnermi naliliisartumik kikkunnulluunniit attuumassuteqanngitsumik nunani tamalaani akuerisaasumik aningaasartuutaaqisumillu akuutitsinissamik Naalakkersuisut pisussaaffilerneqartariaqassasut².

3. Ataatsimiititaliap suliarinninnera

Aalajangiiffigisassatut siunnersuutip Inatsisartuni nalinginnaasumik taparserneqannginnera Inuussutissarsiornermut Aatsitassanullu Ataatsimiititaliamit maluginiarneqarpoq. Taamatullu siunnersuutip itigartitsissutigineqarnissaanik Naalakkersuisut inassuteqartut.

“Ujaqqat nunatsinneersut pinnerasaasiat ujaqqallu nunatsinneersut qiperukkat pillugit uppernarsaammik allagartaliisarneq pillugu nalunaarusiaq” 2017-imeersoq ataatsimiititaliamit misissuataarneqarpoq, aallaavittullu taamaallaat uppernarsaasiisarnikkut aaqqissuusseriaatsit marluk pullavigineqartut maluginiarneqarluni; ilisimatuussutsikkut uppernarsaaseeriaaseq imaluunniit nittarsaanermik aallaaveqartumik uppernarsaaseeriaaseq. Ilisimatuussutsikkut uppernarsaaseeriaaseq annertuumik aningaasartuuteqarfiusussatut allaffissornikkullu pisariusussatut erseqqissaatigineqarpoq. Naalakkersuisut naliliipput aaqqissuussinermik akisoorujussuarmik allaffissornikkullu pisariusumik pilersitsinissaq

² https://ina.gl/documents/para3637/2018/svar/335_2018_Smykkestenscertificeringsordning_PPOL_akissut.pdf

pinaveersaartariaqartoq, taamaammallu ilisimatussutsikkut uppernarsaaseeriaaseq Kalaallit Nunaannut naleqqutinngitsutut nalilerneqarpoq. Taamak isummerneq Kommuneqarfik Sermersuumit, nassuiaat pillugu tusarniaassummut akissuteqaatikkut taperserneqarpoq. Ataatsimiititaliaq allatut naliliinissaminut tunngavissaqarsorinngilaq. Taamaalilluni nittarsaassinermik aallaaveqarluni uppernarsaaseeriaaseq kisimi periarfissaalerpoq.

2016-imi apersuinermi annikitsumik aatsitassarsiornermut akuersissummik peqartunit 25-usunit 14-it uppernarsaaseeriaatsimik ujtartuisimasut siunnersuuteqartumit erseqqissaatigineqarpoq. Ataatsimiititaliali maluginiarpaa sammisaq pillugu december 2018-imi annikitsumik aatsitassarsiornermut akuersissummik peqartunit 20-iusunut najuuttunit erseqqinnerusumik oqallisiginninnermi nittarsaassinermik aallaaveqarluni uppernarsaaseeriaatsimik ujtartuisoqarsimanngitsoq. Kalaallit Nunaanni annikitsumik aatsitassarsiornermut akuersissummik peqartut 25-iusutut nalunaarsorneqarsimasut ataatsimiititaliap maluginiarpaa, taamaalillutillu annikitsumik aatsitassarsiornermut akuersissummik peqartut najuuttut inuussutissarsiummik ingerlatsisunut sinniisuusutut nalilerneqartariaqartut.

Ilisimatussutsikkut aallaaveqartumik uppernarsaaseeriaaseq akisoorujussuurtut allaffissornikkullu pisariusutut nalilerneqarmat, 2018-imilu kingullertigut inuussutissarsiummik ingerlatsisut akornanni malitseqartitsinermi nittarsaassinermik aallaaveqarluni aqqissuussinissaq inuussutissarsiortunit ujtartorneqanngitsoq paasinarsimmat, ataatsimiititaliaq ataatsimut isigalugu isumaqarpoq siunnersuutip tunngavilersuutaa patajaatsumik toqqammaveqanngitsoq.

Siullermeerinninnermi kingornalu ataatsimiititaliami oqaluuserinninnerit tunngavigalugit ataatsimiititaliap paasinninnera malillugu aqqissuussinermik pisariitsumik nammineq piomassuseq malillugu atorneqarsinnaasumik, annikitsumik piiaanissamik akuersissutillit uppernarsaasiisinaanerannik ajornarunnaarsitsisumik ujtartuisoqarpoq, tunisassiarisap Kalaallit Nunaanni suminggaaneersuuneranik kiisalu paasissutissanik attuumassutilinnik allanik pisisumut nalittorsaataasunik ersersitsisumik. Taamaattumillu allannguutissatut siunnersuut una ataatsimiititaliamit saqqummiunneqarpoq:

Ujaqqanik pinneraasiassanik nunatsinneersuunerannik uppernarsaammik allagartalersuineramik nammineq piomassuseq naapertorlugu atorneqarsinnaasumik pilersitsillutik atuutsitsilernissaannik Naalakkersuisut peqquneqarnissaannik inatsisartut aalajangiiffigisassaattut siunnersuut. Tunngavigineqassalluni “Ujaqqat pinneraasiassat nunatsinneersut ujaqqallu qiperukkat nunatsinneersut pillugit uppernarsaammik allagartaliisarneq pillugu nalunaarusiaq” juni 2017-meersoq.

4. Siunnersuutip aningaasaqarnikkut kingunissai

“Ujaqqat nunatsinneersut pinneraasiat ujaqqallu nunatsinneersut qiperukkat pillugit uppernarsaammik allagartaliisarneq pillugu nalunaarusiami” 2017-imeersumi

nittarsaassinermik aallaaveqarluni uppersaasiisarnermik aaqqissuussinerup piviusunnngortinneqarnermini aningaasaqarnikkut kingunissai Naalakkersuisut missingersorsimavaat. Siunnersuuteqartumit nassuiaatigineqartumit allaanerusumik naliliinissaminut ataatsimiititaliaq tunngavissaqarsorinngilaq.

5. Ataatsimiititaliap inassuteqaatai

Inassuteqaat

Ataatsimiititaliap isumaqatigiittup ataatsimiititaliap **allannguutissatut siunnersuutaata** akuersissutigineqarnissaa inassutigaa

Ataatsimiititaliap taama oqaaseqaateqarluni isumaliutissiisummilu allassimasutut paasinnilluni siunnersuut aappasaaniigassanngortippaa.



Henrik Fleischer
Siulittaasoq



Hermann Berthelsen



Múte B. Egede
Siulittaasup tullia




Aqqalu Jerimiassen



Randi V. Evaldsen



Peter Olsen



Tillie Martinussen